



Broj: 01-50-2452/11
Datum: 22.7.2011. godine

PREDMET: Odgovor na članak objavljen na web portalu:
http://www.cin.ba/Stories/P27_Justice/?cid=1013,2,1

Poštovani,

Povodom Vašeg članka „Prijava na konkurs i bez pravosudnog ispita“ objavljenim dana 24.6.2011. godine, u kojem se ističe da Nedim Ćosić, stručni saradnik u Općinskom sudu u Sarajevu u momentu podnošenja aplikacije na navedenu poziciju nije imao položen pravosudni ispit, želimo Vas informisati slijedeće:

Konkurs za tri pozicije stručnog saradnika u Općinski sud u Sarajevu, raspisan je 27.2.2007. godine i isti je bio otvoren 15 dana, odnosno do 14.3.2007. godine.

Za poziciju stručnog saradnika, po navedenom konkursu, prijavilo se ukupno 18 kandidata, među kojima je bio i Nedim Ćosić. U momentu zatvaranja konkursa, Nedim Ćosić nije imao položen pravosudni ispit. Međutim, praksa Vijeća je bila da se nakon verifikacije svih prispjelih prijava kojom se provjerava validnost podnesenih prijava (koja uslijedi par dana nakon zatvaranja konkursa zbog prijava koje su poslate putem pošte i traje narednih 15 dana). Bez obzira što u svakom konkursu stoji naznaka da se „nepotpune i neblagovremene prijave neće uzeti u razmatranje“, svi kandidati koji nisu priložili neki od traženih dokumenata, a njime se dokazuje određena činjenica, pozivaju se telefonskim putem da iste dostave u roku od 7 dana i upozoravaju se da će u protivnom njihova prijava tek onda biti odbačena kao nepotpuna.

Tako je postupljeno i u konkretnom slučaju, te je Nedim Ćosić u ostavljenom roku dostavio Uvjerenje o položenom pravosudnom ispitu iz kojeg je jasno vidljivo da je isti položio dana 29.3.2007. godine pred Federalnim ministarstvom pravde.

Posebno ističemo da su članovima nadležnog podvijeća, koje je određivalo kandidate sa kojima će se obaviti razgovori, bila poznata navedena okolnost, odnosno da kandidat Ćosić u vrijeme podnošenja prijave nije bio položio pravosudni ispit. Međutim, u vrijeme odabira kandidata koji će se pozvati na razgovor, pomenuti kandidat je već bio dostavio dokaz o ispunjavanju traženog uslova. Ovo nije bio usamljen slučaj, jer je bilo još kandidata koji, u momentu prijavljivanja na konkurs, nisu ispunjavali neki od traženih uslova, ali je bilo izvjesno da će taj uslov biti ispunjen u vrlo kratkom periodu, pa je Vijeće takve prijave prihvatalo, s tim da su svi takvi kandidati u momentu obavljanja intervjua i eventualnog imenovanja, morali ispunjavati sve tražene uslove. Ovakva praksa ranijeg saziva Vijeća je bila ustanovljena (kada je imenovan i Nedim Ćosić) zbog dužine trajanja konkursne procedure (koji je trajao najmanje 5-6 mjeseci).

Sa kandidatom Ćosićem za navedenu poziciju, intervju je obavljen 26.6.2007. godine, kada su intervjuisani i svi ostali prijavljeni kandidati, a imenovani je preuzeo dužnost stručnog saradnika 1.8.2007. godine, dakle četiri puna mjeseca nakon što je položio pravosudni ispit.

Navedeno tumačenje Vijeća je u skladu sa odredbom člana 43. Zakona o sudovima u Federaciji BiH (Službene novine Federacije BiH“, broj: 38/05 i 22/06) koji propisuje da za :“ *Za stručnog saradnika u sudu može biti primljen diplomirani pravnik sa položenim pravosudnim ispitom.*“

Iz navedene zakonske norme jasno proizlazi da za stručnog saradnika ne može biti imenovano lice koje nema položen pravosudni ispit, ali nije definisano u kojem momentu kandidat mora ispunjavati navedeni uslov. Takođe je bitno napomenuti da ovo nije bio usamljen slučaj, pošto je bilo još ovakvih primjera, a pogotovo je bilo više primjera da kandidati za sudijske i tužilačke pozicije, u momentu prijavljivanja, nisu ispunjavali uslov u pogledu dužine traženog staža.

Naprijed je navedeno kakva je bila praksa ranijeg saziva Vijeća, ali treba posebno naglasiti da niko nije imenovan na bilo koju pravosudnu poziciju, pa tako ni poziciju stručnog saradnika, bez ispunjavanja zakonom propisanih uslova. To što je otac gospodina Ćosića nosilac pravosudne funkcije, nikako nije bio razlogom za prihvatanje njegove prijave niti imenovanja za stručnog saradnika u Općinski sud u Sarajevu. Imenovanje gospodina Ćosića na navedenu poziciju, isključivo je bazirano na rezultatima ostvarenim na intervjuu, kada je od 18 prijavljenih kandidata, imenovano 8 najbolje ocijenjenih kandidata.

Zbog pravilnog obavještanja javnosti, također navodimo činjenicu da gospodin Šesenam Ćosić (otac Nedima Ćosića), aktuelni glavni tužilac Tužilaštva Tuzlanskog kantona, nikada nije bio sudija Suda BiH, kako je navedeo u tekstu CIN-a.

I na kraju treba posebno istaknuti da, na sve pravosudne pozicije, pa tako i na poziciju stručnog saradnika u Općinskom sudu u Sarajevu, Vijeće je biralo kandidate koji ispunjavaju zakonske uslove, vodeći računa i o drugim faktorima koji se cijene prilikom odabira kandidata za koje smatra da su najkvalifikovaniji, na osnovu radnih rezultata, poznavanja zakona i sposobnosti da svoje dužnosti obavljaju profesionalno, efikasno, nezavisno i nepristrasno, a istovremeno vodeći računa i o proporcionalnoj nacionalnoj zastupljenosti konstitutivnih naroda i ostalih.

S poštovanjem,



Predsjednik
Milorad Novković
Milorad Novković